

摘藻堂四庫全書薈要

集部

欽定四庫全書薈要

集部

御選明詩卷三

四

詳校官原任主事_臣李斯咏

欽定四庫全書薈要卷一萬八千五百三

集部

御選明詩卷三

四言詩

劉基

秋懷八首

錄六首

涼夜悠悠華燈有輝淒風動林明月在帷山川迢迢遊
子無衣瞻彼原隰零露漙漙靡草不凋無木不稀不覩
逝波焉知昨非亭亭南山有蕨有薇黃華晚榮紫芝秋



肥歲云暮矣胡寧不歸

陟彼高原望彼中陵
玄商夕振白露宵零
蔚彼茂草化為枯筵
我有素琴玉軫朱繩
彈為陽春旭日滿庭
愴悵興懷悲來填膺
子期逝矣其誰汝聽

嗶嗶草蟲慄慄其股
歲暮如何爾獨良苦
瞻望日月綿綿我愁
如彼逝矢一往不留
嗟爾小子時不再得
匪緡曷魚不藝胡稷
蕭蕭草蟲烈烈其音
歲暮何為祗攪我心

中庭有棗纍纍其實零露既降歲事孔疾循彼階軒有
鳴蟋蟀豈其感發而不栗烈南山岑律松柏蕭瑟彼蘭
斯猶彼枳斯橘安得羽翼載飛載鵠汜濫入荒以終永
日

鬱彼晨煙亦曼于楚瑟彼枯楊策策其語良辰幾何亦
既徂暑溥彼郊原有禾有黍淒風夕興鴈驚如雨

今日何日歲聿其秋候鴈北來星火西流懷我故鄉道
阻且脩俯察淵潛仰睇天游孰翱匪鳶孰躍匪虬瞻望

日月中心如抽豈無美酒焉得良儔矢詩不多聊以解憂

有鳥一首贈袁尚志

有鳥有鳥薄言繳之君子至止何以樂之有酒湑湑亦盈于觴明月照帷清風滿堂我酒既旨我儀有秩言念君子溫如其日有鳥有鳥載好其音君子之洽如瑟如琴有斐有翼有勸有飭古訓是式大猷是力有栗者璧瑕則磨之有紆者絲色以訛之如彼織絰君子維經如

彼鋒刃君子為礪無為夸毗無為戚施伊我之僨亦子
之瘼此令朋友交相為助匪中式孚俾好作惡有酒在
觴有琴在堂酌言鼓之心焉孔臧有鳥有鳥載翺載飛
豈弟君子式昭令儀業不厭修學不厭多既酌以酒復
相以歌

東園之柳

東園之柳萋其黃矣瞻彼白日煥其陽矣
瞻瞻懷思曷其長矣

東園之柳萋其青矣瞻彼白日煥其明矣
矐矐懷思曷其平矣

東園之柳冉冉其華悠悠行人玄髮卒華
瞻彼白日維懷永嗟

黃鳥于飛喈喈其音惇惇行人悠悠其心
瞻彼白日維懷永吟

題蘭雀圖

有雀有雀亦集于棘無啄我蘭空林多風
霜落其漙漙

彼孤芳克貞以完無俾荒蕪以永歲寒有雀有雀亦集
于枳無啄我蕙空林多風雨雪有暄婉彼孤芳克貞弗
替無俾荒蕪以永終歲

春夜

春夜迢迢微風不興六合無氛銀河欲冰月流素波星
回玉繩孤坐不寐憂思相仍壯年已謝昔非莫懲如彼
老馬心念超騰道路崎嶇勤不可能俯撥紅爐仰剔青
燈欲與晤語誰其我應

青陽

青陽俶載白日孔昭草生于野華發于條隨氣成形或
蘩或翹睠睠興懷中心飄搖麥有雉雒藻有魚跳嚶鳴
在樹磬管簫韶駕言出遊以猶以陶璠不可髻簪不可
天自非松柏不能後凋來者弗畏往者其消

陶安

詠當塗張縣尹善政

有美君子嘗觀國光賢書載登赤紱斯煌再命陞爵來

于荆湘尹茲百里編氓樂康

理涵于心道積于身克施有政民德亦新耕桑被野雨
暘屢勻衆庶而豐侯儉而貧

民有雞豚我盤蔬茹民有紬帛我衣布素閭閻士女瘡
痍是撫瘡痍既瘳我體完固

公綽不欲滕薛非長子產惠愛刑書靡良侯兼其德政
有紀綱三年化行嘉猷孔彰

英英白雲遠瞻是惻遙歸于南承顏有懌願為時雨均

此下國維茲邑人永思無斁

袁凱

送貢先生入閩

日月異行川岳異塗嗟嗟我人胡能並居衍衍夫子奕
世之儒嬰耽世華而味道腴伊余後生固陋荒蕪學匪
上達質為下愚既蒙不鄙通家視余朝趨函丈夕陪座
隅話言諄諄既霑且濡其霑如何如彼時雨膏液滲漉
萌芽翹舉庶幾有成實堅實好如何翩然遠邁于道肅

肅王命孰敢後之
峩峩閩關載驅載馳
湯湯江流泛泛
行舟剝剝僕夫負擔
以趨悠悠長林蕭蕭
逝波瞻望弗及
為之奈何昔為長葛
松柏是依今為轉蓬
蕩然無歸山則有礪
河則有渚嗟嗟我人
獨行踽踽天高無窮
地長茫茫允矣夫子
何時可忘

蔣氏壽萱堂

湜湜黃浦東流為莆
維莆之陽季碩氏居
維季碩氏夙失其怙
母氏是拊是復是顧
是乳是哺燥濕易處
不敢

笑語不敢恐懼母也勞苦既長而教出就于校復因復
好克荷克紹母也其嗇嗟嗟我母如彼昊天何以報之
維以永年燧燧芳草樹之于陰翼翼高堂匪高且深維
此芳草其氣揚揚母氏覲止其憂乃忘既忘其憂其樂
悠悠無有災咎維康維壽維壽其何如山如河不竭不
磨寢食具宜叶水有游鯉陸有秔米烹炙淅洗甘膏叶
滄瀨酌此春醴于堂之北于堂之北旦旦若是曷其有
既我歌我詩置之于楫告爾後來告爾後來季也可儀

徐氏建華亭學詩

渠渠新學徐卿始作伊誰克完季子仲寬維此新學始
亦甚隘爰斤爰構以就于大其大維何有門言言有堂
軒軒有廡騫騫有階平平高墉連連鑿池濺濺樹木芊
芊凡民之俊其來如雲小心鞠躬不惰以勤維昔玄聖
訓言斯明百工居肆匪肆不成嗟嗟爾俊亦既知止豈
徒誦言厥有微旨其旨維何曰仁與義明明仁義不遠
甚邇爾求其方先我孝悌維此孝悌為仁之始始于家

邦終于四海昔為棧樸今則梗櫓昔為砥砢今焉璠璣
是蓄是儲邦家之需嗟嗟爾俊克就茲美誰其始之徐
氏父子徐氏父子可謂曰賢我歌我詩刻于學宮以告
後人以永其傳

胡翰

之子于征美監曹陳生也陳生歸省其母奉養
于京師故勗其行以慰其母心焉

之子于征有楚者衣翼彼北風翩其以歸豈忘在公爰

恤爾私惟皇有命來慰母思之子于征言汎其臚明發
于越夕濟西吳薄登于畿安車載驅惟皇有命將母來
居之子有母令儀有忉養則有祿皇斯爾錫曷以報之
顧懷罔極竭爾臣節迺殫子職

管訥

素堂

湘水之涘衡山之陽有美一人于焉構堂維棟維桷匪
雕匪斲不尚其華爰復其朴堂之翼翼人之諄諄匪謀

自適爰以養親于時興止于時甘旨朝夕弗違惟親之
喜委順在天窮達是宜居易而行心毋外馳奢則盡情
儉以養德用戒後昆服之無斁

王沂

題觀泉圖

茫彼泉水其清瀏瀏既出于山亦經于丘原則有坎陸
則有岐汪汪洋莫知所之奔壑西馳經天東注夫豈
性然勢激而寓斂此涓滴至于尋丈隨波同流惟海是

向彼觀泉者朋簪童琴洗耳其操濯纓其心鳴雨林臻
霏雪厓至時不待人圖不盡意漆園蒙莊妙契淵默君
子人與果行育德養正之功有漸無已勗爾後來是之
取爾

黃淮

勵志

猗猗者蘭于彼空谷悠悠我思曷云其穀猗猗者蘭維
芳維馨我有好爵君子攸寧蘭之榮矣繁霜瘁之靜言

孔念中心悵而蘭之瘁矣益厚其根我之懷矣匪善奚
敦蘭之瘁矣芳華載陽淑慎其身終焉允臧

王直

騶虞詩

有靈者獸是曰騶虞環滁之山以潛以居其靈維何莫
之與匹既玄其文而白其質猊首虎軀尾參於身一日
千里孰知其神振振仁厚不踐生草彼物之生亦不以
飽維天生之亦自天成聖明之世為祥為禎維今天子

道德純至肫肫皇仁遠邇一視昭事上帝曰敬曰誠孚
於下民皆樂其生皇天惟親兆民胥悅神祇效靈騶虞
乃出石固之山榮光燭天百獸從之其行蹢躅彤軒文
檻帖然自致翼以祥飈獻于天子天開日晶慶雲垂英
百僚歡趨騶虞在廷騶虞在廷實為大瑞龍馬神龜乃
同其類昔在太宗文德武功騶虞之來頌聲淪淪維今
天子祖武是繼騶虞復來以昭盛治穆穆聖明天眷滋
彰萬世之隆萬世之光小臣作詩以歌盛美播之韶鈞

垂示無已

梁潛

清河詩

河流渾渾聲自古昔橫亘萬里潢汙霆激觸乎崑崙蹕
乎龍門震掉奔騰入乎無垠惟皇聖明百神效靈湯湯
蒲津河流載清始視其流混漾弗定若鑛在鎔五彩輝
映厥既清矣靜影浮空榮光上燭煜乎溶溶若挹而注
若涵而蓄元氣默融太和潛漉纖滓弗滯淵乎若澄千

峰倒浸湛乎若凝蒲津之堧幾數萬里烏翔而迴魚駭
而逝屬時載陽揖而詠之祥飈慶雲盪滴無涯觀者如
堵聞於京師京師髦倪鼓舞孩嬉列章帝庭帝弗矜異
曰匪在茲益惟寅畏於惟河流為地之紀四瀆之宗五
行之始在昔皇祖戡定萬邦惟茲河流駿發其祥我皇
繼統舊章是則河之清矣如軌合轍河之既清萬民以
寧萬方畢來物以阜成顧茲河流念我皇德東漸西被
始自家國皇皇弘化功邁三五如彼河流行地東注河

流浩浩孰非皇仁淪肌浹髓品物皆春河流洋洋皇帝
壽考於萬億年為民父母

岳正

營建紀成詩

天眷皇明誕命高祖俯建萬方定都江潁如龍斯蟠如
虎斯踞以朝以會以享以祀逖矣厥謨欽于世世一天
眷皇明亦啟文祖為厥孫謀聿又胥宇碣石之西太行
之東有嚴厥宮四海是同二維帝即祚夙夜顧諟神既

受職民亦綏祉乃繼乃述乃經乃營戢此土工為萬國

宗三有赫朝堂有翼廟廷瑣瑣公府總總偕興士方耕

矣女方箴矣曾是不驚奏功成矣四匪臣之功伊民之

力匪民之力維帝之則帝曰匪予文祖之德天相文祖

爛其營室五

童軒

味道齋詩為秀才程裕賦

道之旨太羹玄醴君子味之渾然斯理

道之腴熊掌及魚君子味之淵乎其微

於皇天命一誠不已文王大聖不顯於已聖也希天賢其希聖動靜或愆為道之病

君子味之是謂自持朝斯夕斯道豈遠而

吳伯通

嘉禾瑞麥詩

萋萋禾苗在彼東阡有黍有粟靈雨膏焉益之霖霖稼滋蕃鮮一莖三穗茲豈偶然父老僉曰我尹仁賢尹不

自居功歸于天和德于上吾皇惟乾臣則坤道代終無
愆卓哉令尹君子謙謙我昔持節宛洛十年作人無效
永負魚鳶披圖感媿旱麓之篇安得嘉穀於初三川

程敏政

辟雍

有嚴辟雍四方之則孰其師之一人孔碩眷此碩人明
德是崇穆其家風自清惠公侍禁有聲出教國子橫金
服緋再命伊始戟門夜啓舍菜于庭碩人顧瞻是儀是

刑朝鼓鏜鏜碩人升坐諸生執經或右或左相帝之治
爰藉羣才遲此碩人樂哉斯培材成孔易功亦云懋者
俊之求入副元后允茲明良庶事攸康蔚有耿光吾道
之昌

石瑤

遠遊

君之出矣遊如之何朝覽冀野夜浮滹沱帝子不逢中
流揚歌高鳥墮雲游鱗溯波曷發崑崙曷濯洧盤禾黍

蔽野童欣耄歡新聲在梁清酒在尊聊以永日以抒憂
煩

趙同魯

平賦詩

有序

國家賦役之重莫逾江南在江南諸郡又莫蘇松
若也而賦額尤苦於不均或膏腴而反輕或瘠薄
而反重腴而輕者雖倍其入不過十稅其一瘠而
重者稍加其耗則稅其三之二矣其始蓋由國初

以田賜功臣之家及豪強兼并者私重其租厥後
犯法沒入則視其租以徵稅甚至陂湖沙漲咸在
焉且輕者多入富家而重者則歸細弱是以富益
富貧益貧吳民世受其患實由於此矧洪武間轉
漕道近且海運不廢故耗輕而民不甚病逮永樂
中定都北方武臣憚道之險疏裏河以通漕於是
行資餽直咸出於民始倍其耗故歲輸恒歎而逃
亡相繼宣宗章皇帝明燭是弊詔減官田三分之

稅柄國者復寢不行時蘇守況侯抗章上請得遵
優旨又賴巡撫尚書周公設水次倉以便輸納立
對支易銀諸法以省遠役故民頗蘇息而催徵易
竣適年水旱薦臻疫癘時作餓莩接跡死亡相枕
雖大臣奉命屢加賑卹而瘡痍未瘳譬猶揚湯止
沸而不撤其薪投膠理濁而不浚其源未見其可
也乃去年秋御史中丞陳公奉勅巡撫京畿下車
之始首布均則之令俾當出耗者賦額輕則倍之

稍輕則半之而最重者則免焉參合分割多寡適
均貧者獲甦富者知其至公亦無不悅服田野阡
陌間歡聲相屬不絕以為斯令也誠得聞之於朝
著為定制則我公之德將與皇明之運同垂於無
窮矣若是而頌聲不作非在下者之責歟同魯跽
伏草野親沐膏澤有不容嘿者謹撰平賦詩一篇
庸紀其實俾來者無忘焉

於赫皇明奄有萬方貢賦包篚罔不來王矧茲畿甸揚

州之野厥土塗泥厥田下下因地制賦初匪不均末流
敝刑輕重攸分或輕而腴或重而瘠富食其利貧罹其
厄宣皇憫焉明詔是頒十宥其三民用乂安逮乎邇年
歲祲癘作老弱纍纍填溝委壑事既上聞屢下優詔亟
命大臣撫綏慰勞賑之雖至民則未甦繼命我公我公
曰吁盍澄其源盍正其本不釐爾賦曷救爾窘輕重參
停各盡其情如鑑之公如衡之平若解倒懸若拯焚溺
謳歌鼓舞道路充斥譬彼雪壑釋然春融誰其致之實

惟我公何以報之願公受祉母久賢勞歸相天子天子
元首我公股肱一德交孚福我蒼生野人作頌敢告太
史祝我皇朝億千萬祀

戴冠

女蘿篇

瞻彼女蘿托身喬木朝兮煙綰夕兮雲矗嫋嫋千尺下
引深谷谷不可施斤不可斲豈無桃李懷此幽獨相依
萬年惟日不足媿彼兔絲蔓于春綠不慎所從其能有

淑

早發順承門外

車人聽雞起整戎索轡轡轆轤言出京郭三星在天明
月未落霜風徐來客子衣薄

許讚

池有荷

池有荷懷友也

池有荷其葉祁祁君子至止佇立以思懷我良朋在天

之涯

池有荷其花灼灼君子至止眷言有約篤我良朋其在
西郭

池有荷其實離離嗟我懷人眷茲盛時遠想其風近挹
其儀維金維玉我心則怡

唐寅

送文溫州

日月徂暑時風布和遠將仳離撫筵悲歌左右行觴緝

御猥多墨札參橫冠帶崔我絙絃嘈嘈嘉木婆娑孔雀
西南止于丘阿我思悠悠慷慨奈何

陸深

修竹篇三章

瞻彼修竹薄言睠之依依庭除託植在茲我悅我親以
況其儀竹之苞矣以慰我思

瞻彼修竹其色如玉眷言顧之豈曰空谷出則爾恭入
則爾復君子之居清風穆穆

瞻彼修竹鳳皇于飛歲聿云暮泥泥有輝崇是正直以
保中虛君子萬年神明所依

李夢陽

和方山子歌

餞者在郊黃鳥交交楊柳蔭車有酒有肴

何景明

原有楚贈韓子也

原有楚隰有苦子車駟牡駕言徂矣見子之父

原有柎隰有蓼子車駟駟駕言遊矣見子之母
原有桑隰有唐子車駟黃駕言行矣見子之兄
子涉渭矣渭水漚漚我思見子安得北流

王九思

渭川懷康子也

渭川有竹其葉脩脩繫彼美人于焉逍遙愛而弗覲我
心搖搖

渭川有竹亦濱于水繫彼美人莫我肯通願言卜築于

子之里

渭川有竹風以散之繫彼美人何日見之何日見之中
心戀之

謝承舉

四言

一丘一壑一笠一裘日朝月夕無春無秋春日而游秋
月而休花開鳥啼山空水流

張時徹

彭彭者車

彭彭者車于彼河洲有美丹漆不以飾輶彼君子兮使我心憂

彭彭者車于彼河側矯矯騏驎不以服輶彼君子兮使我心惻

李攀龍

效阮公二首

太清孔揚元氣絢緼靈曜懸鑒列宿垂文威鳳振羽神

龍作鱗蕙蘭幽鬱松桂輪囷

日照月臨天高氣清金支秀華羽林翠旌六駕龍秋四
牡鸞鳴濯纓雲漢晞髮增城

王世懋

弘農詩

清晨脂車發自陝疆峻彼兩崖夾轂周行載馳載西劃
然中明湯湯洪河忽置我傍懸流飛沫既翕且張終南
在南中條在北首陽冠之蒲人所宅粵有太華蒼然四

塞芙蓉目成攬之弗得前琮後璜遺珠在側嶠函既窮
會同三方策我駟馬陟彼高岡誰謂晉遠一葦可杭誰
謂關長一九可望厲顧盼天風吹裳昔在戰國角險
競雄狡焉之辱山川是蒙赫赫皇明車馬來同雖有天
險恃德弗庸靈蟠瑞凝乃生鉅公翊我泰階鬱若高墉
皇皇者華曰有奔走觀風自東獲我良覲既嘉既樂土
風之厚哀彼營窟亦孔之疚小臣咨諏敢告良守庶無
西顧以攄我后

李維楨

甘露

甘露瀼瀼于彼護草君子之澤無憂用老

英英白雲為此旨酒拜獻于公以祈黃耆

天降膏澤汜布護之彼君子兮載覆露之我歌且謠以
永譽之

馮行可

鳧飛二章

鳬飛為鴻雲渰成嶂寸失于尺銖失于兩遠則宜然近
何以爽子而不知孰也予諒

毋憎我言言則子藥毋惡我攻攻則子錯毋曰不灼毋
曰可畧纂則成城針則成幕

原田

原田不耨維草其宅美稷不獲維禽其食我有靈淵曷
為湮塞塵坌汨意美好亂色日居月諸如弦如翼愚者
戀歲君子懷德高山易樹卑渚易荻我思古人心如結

織奉以周旋庶幾無慝

我行

蓬生依麻藪蔓于野我行思子山川伊阻
念子浮海憂心如春誰同流水日日朝宗
歟彼晨風依其在林之子一去邈若飛沈

陳第

北征道中四篇

翩翩五兩載發載遠沙灘累累溪流反反臨此劒津伊

思塞苑我有所懷遙展嫵婉

秋風拂拂楊柳淒淒商羊為虐樹杪棲泥四野蕭颯幾
乏遺黎羈人夜泊蟋蟀宵啼

四望茫茫原隰膺膺亂江涉淮云戾徐土我授我衣復
越齊魯家鮮擔儲憂我父母

天邊鳴鴈行列麗麗伊誰云從實維我師我師元老壯
志不萎過古戰場愾然嗟思

馮時可

南陔

循彼南陔原田每每我黍既成我酒既醅葡萄初潑酌以金罍駐我慈顏庶幾不頽

我昔于役登山采杞王事靡盬不遑將母今我閑居吳江之涘山畔有萼澗濱有芷屑屑斗筭能奪甘旨

孫高士

靈巖抗雲石室逼霄松韻笙簧石漱瓊瑤先生處茲名理自超高邁匪隱玄跡非標神龍變化大鵬逍遙笑彼

下士崔附菱苔

鄒元標

客行

有客有客言白其馬于以係之空谷之下

有客有客言載其舟酌彼金壘以詠以遊

白駒皎皎輝谷孔多何以贈之解我珮珂

子啟舊育于南林為之賦有鳳

有鳳有鳳棲彼枳林誰之懷矣遺我好音

有鳳有鳳德音不已言顧舊廬載翔載止

高攀龍

水居

薄暮登樓四望遠疇時雨既降農人乍休乳燕來止儵
魚出游萬族有樂吾亦何憂

陳薦夫

大會鄰霄臺

今日何日陟彼崇阿曰有旨酒載詠載歌四海之內弟

允孔多今我不樂去矣如何

范鳳翼

買山清涼山遊憩志喜

伊予夙好養姿林麓如彼倦羽靡思出谷雖乏山資微
尚彌篤惠徼靈丘睠言相屬峰勢却畧松風清穆森閣
冠嶺直造雲族日月粵華曠朗心目鍾竒爭售江練如
束戶庭黝窈悠然靜肅我友勝侶共稟清淑載商崇構
載騁遐矚亦既樂止謂予願足野夫托體洵石與木于

焉用晦媚茲幽獨優游舒嘯爰伸偃蹇

公鴈

唐蒙有絲

唐蒙有絲不可以縫戴星有穀不可以舂天有匏瓜其
誰食之海有昆布其誰衣之飛鳥依人不可與語嘉樹
蔽身不可與處鶴飛于天其鳴在陰魚沈于淵其潛在
深

張鴈

春雪飲紅梅花下漫詠

我聞花災風欺霜妬惟其爭妍故有銷墮寒梅孤特傲
然風霜白惟素質紅則淺妝一枝雪態萬點春光誰為
清伴疎竹兩行澹影無聲冰肌有骨鶴舉逍遙龍潛孤
寂冷韻一庭浮香四壁乘時得氣杲日東生雪消水來
大地成春萬紫千紅繽紛獻媚開落無言梅花斯貴

焦竑

宗人時中之南鴻臚索余詩為韋弦之佩作此

與之

炎帝開天垂仁創制爰及西周眷彼苗裔實始焦城離
疆啟世維陝有焦古曰名都胙土命氏此其權輿有焚
孫子綦時星敷代易世疎本根一氣譬若干江同源派
異念茲厥初慨焉以喟猗猗令族來從宛陵有璧在懷
和風鬱蒸匪我則阿實宗之英觀光上京音徽日振遶
遊冬春載觴載詠豈無他人不如同姓攜手亡何周南
以遷孰是典司曰臚句傳何時復來一別三年漢有延

壽經學之宗亦有孝然飛聲青龍和談遂飲奕葉清風
我我德素開我後人庶其繩之以慰所親匪仁曷仗匪
善曷敦一簣非微為山可至千里雖難脂車策驥華胄
遙遙孰敢不厲

戴九玄

三月三日同社修禊東湖

暮春其柔元已維朝招我友朋薄言臨流蘭粦其英柳
滋其條川鳥羣飛淵鱗載浮服我春服汎彼輕舟羣動

咸熙于焉遨遊

婁堅

祁之柳二章分寄君實伯隅

祁之柳其葉油油自我送子于祁之洲佇立望之莫知
我愁豈不能言以寫綢繆我言斯永我心則憂乃如之
人洵美且修我之所臧人以為尤

祁之柳其葉爛爛自我送子于祁之畔佇立望之莫知
我怨豈不能言以寫嘅歎我言之長我心則亂乃如之

人洵美且燦人之所榮子以為患

陳繼儒

新開園圃

行高初筮節甘暮年愛素好古辭事就閒裂石介道植
竹引泉少時繁密有若自然誰美同此山癯列仙

書壁二章

衡門之下有琴有書載彈載詠爰得我娛豈無他好樂
是幽居朝為灌園夕偃蓬廬

人之所寶尚或未珍不有同愛云何以親我求良友實
觀懷人歡心孔洽棟宇誰鄰

鍾惺

自題深山圖

爭日分煙草木昭晦寒吹暄肅風泉斯籟辟岸無階衡
廬若對石走波停緩急時會崎嶇抵觸雨存無礙尋梁
契集坦步人外誰謂山空中有嘯欬往來非無滅迹輕
靄辟彼禽魚叢淵之內匪莫能圖恥躬不逮

阮大鍼

田野

豹叔瑕仲較書遠塾晤言成阻秋野屏居觸情宵
旦難已于懷

蕭蕭田野矯矯修林暘雨夜滌山氣朝深婆娑一室有
觴有琴弄琴銜觴爰寫我心田野蕭蕭修林矯矯村靜
鳴雞天長歸鳥明月宵盈軒墀淨皎偶影其間羣象載
悄迢迢星宇夜境其幽蟲聲嚶嚶若或相求園列靜詩

雜籟交流我思君子飢飭曷酬良夜有燦良辰有撰霞
冠鮮姿颺迴餘善與子遊般期罔或倦豈無他人懷我
親串

侯恪

題曹元芝山水卷子

綠樹蒼蒼白石粼粼閑雲野鶴山高水深結廬獨處中
有幽人晏然不事鹿處為羣春日鳥鳴其氣氤氲載往
載來以酌以斟扁舟明月孤棹長吟湘蘭九畹花可為

茵丹經玉朮延壽萬年笑彼人士牢役風塵安知空谷
鸞鳳之音

梅守箕

送潘景升北遊

鬱鬱寒雲興于崦嵫白露既下嚴霜戒之水歸其壑榮
變而衰時之方殷如何弗悲

薄言送之于江之濱弓矢在御佩服孔明百里旋風千
里異雲如何良友遂此離分

顧瞻帝京宮闕我我左肩滄海右帶濁河太行接輦憑
蒿介華建瓴之勢萬國是儀

七國雄門五陵俠士羃霧連雲星流電駛載塵康莊揚
風易水惻惜荆高經過趙李厯厯天上不瑕有咫娛心
極宴聊樂我止

高鶩遠眇至彼朔方煙塵野合關塞悠長接流瀚海託
鄰羶鄉悲笳夜呼春草旦黃堅冰蔽道車頓馬傷言念
君子憂思不忘

熠熠飛鳥振翮願升去其南陵集于北陵恥與黃口附
風超騰鶴鳴在臯鴈慘于冰翼彼南風亦懷其乘我思
伊人終莫可勝

我有斗酒好與君期徵歌鼓瑟以樂斯須來茲未明去
日難追勉旃周道毋以后時

鄭鄠

賦得威儀棣棣二章

雒水之濡有馬負圖雲章炳炳洵美且都盍亦覲止君

子之符

岐山之陽有鳳言翔瞻顧容與鳴于高岡盍亦覲止君
子之章

賦得山有榛隰有苓二章

采彼榛兮在山之阿山中無糧芝田玉禾涼颼清發念
子實多欲往從之慨當以歌

采彼苓兮在山之隰山中無裳雲綃霜褶白露既零簫
聲何急欲往從之慨當以泣

張采

相陟二章

詠學也相水陟山
若或喻焉作相陟

相彼流水滔滔何極上下上下舟泛魚宅毋以盈坎昧
厥蒙出

陟彼高山與天地通維巖有塗跬步可從曷云石頑草
木豐隆

陳子龍

上巳同王太守畢郡丞李別駕修禊蘭亭儼古

嘉辰載陽良儔孔多停雲冠嶺輕風扇柯我懷先民在
此山阿散髮玄澗浮羽澄波

朱朝瑛

過沈聞大葭莊

伊人何在在蘆之漪有堂有亭有林有池一為丘不高
為壑不深其室則邇而有遐心二策杖以游遵彼一曲
釣綸可垂巾酒可漉三與子分手於今六年百爾所思

不如晤言四

朱積

南山三章題畫冊

田于何所南山之南淮水湯湯白石巉巉我欲從君道
阻且長

中田有廬南山之下既懸我車亦秣我馬我欲從君息
駕于野

陟彼高岡北風烈烈我山我阿我陵我闕惟塵冥冥憂
心如惛我欲從君言采其蕨

張若義

晨起

扶桑未出咸池微寒殘月在天疎星猶攢井梧一葉風
篴數竿寂無人聲流水潺潺

宵坐

明月當窗清風入坐流螢點點落星幾箇浮雲頓開虛
空何大我於此間遂不能卧

雜感

湯湯者河無傷我禾民之所天畏彼滂沱
駒有空谷鳥有集木我無幹止無傷我屋
古柏鬱翳蔭我丘壟歎彼飄零俾我神悚
琅玕翠竹中養鳳皇何不顧惜任彼飄揚

馮鼎爵

題菊

凡草則靡凡香則佞獨稟金精坤黃居正肅然其枝挺
然其性長松子男酣楓婢媵葉纈以清跼貞而靜殿彼

羣芳陶我晚興

郭金臺

山居

顏唐土室補苴則已幽映山窗容膝則止維條伊幹株
陰桐藥方塘停淤春魚瀾瀾斗酒夜勞門光星起主酬
旅亞飮饁布鞞來牧飼牛摩挲溼耳雞犬孳息山家福
履豈敢席豐農夫之喜室家終勤小人樂只

沈章

示弟璉

蠡則有蛹蠶則有績矧伊人兮胡不爾德

解一

昔我先人

實懋厥功靡不夙夜克纘其宗

解二

伊余懷兮程是稼穡

一經不遺以永朝夕

解三

朝斯夕斯日月言邁令聞或忒

我心匪懈

解四

人亦有言聲類是求相彼蒼鷹氣化為鳩

解五淵冰在前惕焉戾止繩墨在御敢以勗子

解六

華淑

雜詩

斲木為車其半為輪車自招搖輪何苦辛

自悅

雩詠亭續蘭亭會補任城呂系詩

疇昔有懷陰雨翳霄尤爾居室忽焉終朝際此晴煥散
豁林郊潛魚泳波遊羽鳴條

福報

雩詠亭續蘭亭會補彭城曹誼詩

晴雲冉冉幽草萋萋羣賢戾至衍樂攸同芳葩汎豔翔

羽邇風亦有旨酒可以從容

如阜

雩詠亭續蘭亭會補任城令呂本詩

遲遲春陽靄靄蘭苔樂爾嘉賓以宴以遨靜觀物化散
懷逍遙一觴一詠庶永終朝

妙聲

蒲菴

循彼南澗言采其蒲采之何為滄瀨是圖彼蒲之良利

用為屨載緇載細如執稷黍我思古人維睦之陳克用
是道甚宜其親我行四方十年于今母實有命予何弗
欽乃築我居於越之野悠悠我思朝夕于楚亂離孔憫
山川邈悠豈不懷歸水無行舟爰有清泉在居之側既
浸既灌蒲葉薿薿蒲葉薿薿蒲生日多母氏燕喜我勞
其何

方孟式

四牡夫子行役志思也二章章六句

翩翩者鷩肅肅其羽王事靡盬以風以雨琴瑟在右我心悲苦

檀車憚憚悲風四起父母既遠維予與子相隔千里共飲江水

武氏

贈外

林端綠雪水際紅霞詩香思酒筆藻夢花

四月維夏

四月維夏居也二章章四句

四月維夏濬室閒居戶庭綠重可以詩書
四月維夏百卉俱開清風直入語鳥不猜

夏之日

夏之日游也二章章四句

夏之日嫩人倦起小院閒窗風搖簾子
夏之日重槐輕柳燕子喚人園林宜酒

素帶

四言

郎明日別妾心惓惓願作郎車與郎共歇

御選明詩卷三

欽定四庫全書薈要卷一萬八千五百四

集部

御選明詩卷四

樂府歌行一

劉基

艾如張

有苑者林衆鳥萃之我欲張羅榛楛翳之既礪我斧又
飭我徒孰是奧穢而不剪除爰升于虛以相乃麓有條
我網載秩我目有鳥有鳥五采其章嚙嚙啾啾率彼高

全
卷四
岡張之弗獲憂心且傷寤寐懷思曷云能忘有鳥五采
亦既來止昭其德音以相君子君子豈弟其儀是若艾
而張矣云胡不樂

聖人出

聖人出臨萬方赤若白日登扶桑陰靈韜精星滅芒羣
氛辟易歸大荒晡暝寒谷熙春陽枯根發茁暢幽藏潛
魚躍波谷鳥翔花明草暖青天長青天長聖人壽北斗
軒轅調氣候北辰中居環列宿八風應律九歌奏圓方

交格神靈轅聖人出陽道開億萬年歌康哉

釣竿

斫竹作釣竿抽繭作釣絲滄洲日暖波漣漪綠蒲茸茸
柳葉垂鉤纖餌香魚不知石鱗激水溪毛動玉燕迴翔
竿尾重大魚入饌腮頰紅小魚却放淵沚中更祝小魚
知我意長逝深潭莫貪餌

思美人

雨欲來風蕭蕭披桂枝拂菱苔繁英墮鮮葉飄揚煙埃

靡招搖激房帷發綺綃中髮膚憺寂寥思美人隔青霄
水渺茫山峩羗雲中鳥何脩脩欲寄書天路遙東逝川
不可要芳蘭華日夜彫掩瑤琴閑玉簫魂衆衆心搖搖
望明月歌且謠聊逍遙永今宵

懊懷歌

白鴉養雛時夜夜啼達曙如何羽翼成各自東西去

君子有所思

晨上龍首山徘徊望咸京交衢錯萬井甲第連公卿鞍

馬相照耀冠蓋如雲行
扈從金宮歸賜酒銀甕盈前庭
列騶騎後苑羅傾城寵極妬心起
歡餘驕氣生田實巧相奪
蕭韓互摧傾快意在一時報復延
戈兵范睢掉柔舌穰侯去彊嬴
寧知幽燕客接踵夸雄鳴茫茫前車轍
遺跡猶未平何為不自悟坐使憂患并
二疏獨何人千載垂令名

上山采蘼蕪

上山采蘼蕪山峻路迢遞
下山逢故夫悲風生羅袂憶

昔結髮時願得終百年變故不可期中道相棄捐蓮實
生水中石榴生路側未嘗挂齒牙中心豈能識上山采
薜蘿羅袖生芳菲因君贈新人莫遣秋霜霏落葉辭故
枝不寄別條上白日無回光誰能不惆悵

雙桐生空井

雙桐生空井井空桐葉稀葉稀不自蔽鳳鳥將安歸
雙桐生空井井泥泉不出桐根日夜枯何由伐琴瑟

玉階怨

長門燈下淚滴作玉階苔年年傍春雨一上苑牆來

長門怨

白露下玉除風清月如練坐看池上螢飛入昭陽殿

東飛伯勞歌

南飛鷓鴣北飛鵠黃昏雞鳴白日燭珊瑚石上栽兔絲
鴛鴦獨宿枯桑枝永夜涼蟾入羅幕蟬翼不如秋髻薄
寒塘露蓮千葉紅可憐零落空隨風

白苧詞二首

鏗華鐘伐靈鼓青娥彈絲白苧舞文竿迎風雉振羽長
袖奮迅若雲舉博山霧合春濛濛玉缸搖火生長虹翠
蕩紅翻如夢中

暖香結暝嬌青春翠釵珠壓光照人鳳簫十二煙霧勻
鴻驚燕嬌波龍鱗玉觴交飛酒如沼門外斜陽在林杪
宮中沈沈天未曉

江上曲

江上風吹沙石走江中濤浪如牛吼鄂君繡被寒無香

江水不如殘夜長

蓮塘曲

落日下蓮塘輕舟赴晚涼偶然花片落飛出兩鴛鴦

遠遊篇

三山六鼇背翠水扶桑東雞鳴上海日海面玻瓈紅仙人騎鸞鳳呼我遊雲中雲中有金闕謂是天帝宮明星列兩藩琪樹光玲瓏太一坐端門白髮映青瞳授我玉篆文赤蛇蟠九虹出入元化先壽命齊老童因逢青鳥

使遂造東王公素女如蓮華歌喉絃管同顧盼動環珮
振迅若輕鴻化為五色光倏然隨長風

畦桑詞

編竹為籬更栽刺高門大寫畦桑字縣官要備六事忙
村村巷巷催畦桑桑畦有增不可減準備上司來計點
新官下馬舊官行牌上却改新官名君不見古人樹桑
在牆下五十衣帛無凍者今日路傍桑滿畦茅屋苦寒
中夜啼

瑯琊王歌

駿馬須好鞍強弓須勁箭將軍不知兵健兒空自健

夜夜曲

冬夜恒苦長夏夜恒苦短短長相蔽虧殷勤望推挽
綰茅作繩繩易斷汲水作池池易旱故鏡塵昏難遠照
故衣絮敝無新暖西風嫋嫋吹桂枝白露點苔黃葉滿

思歸引

山高高兮可以望四方胡躋爾巔兮不見我故鄉歲云

暮兮無衣裳車罷馬羸兮僕夫頓僵水有蛟鱷兮陸有
虎狼吁嗟奈何兮惟懷永傷

雪鶴篇贈詹同文

有鶴有鶴丁令威碧玉為骨玄霜衣層城十二身所依
千年伐毛一度歸洗髓織女黃姑磯瑤臺雪花大十圍
食之神爽肉不肥乘風振羽芳菲菲丹砂結頂爛有輝
咳唾璀璨生珠璣朝遊明星夕大驄騰光躡景超巍巍
滕六驂乘虹蜺駢蕊宮仙娥頊帝妃鎔雲鍊雨成瓊歲

眩晃晝奪扶桑暉離眸閃爍不可睇回焱擬擬翼縞旂
白虎殼鯁艮厥腓鸞鵠烏鴻鵠鵠輦鸞鵠鵠鵠鵠與鵠
局促縮胸潛嶠崎惟有皓鶴從之飛竦翮夜過東皇畿
玲瓏琪樹戛金徽砉然長鳴驚海圻海波噴作煙霧霏
馬銜罔象蹲若鞿鯢鯨天矯相噓歔銀河腹堅膠蜃晞
王母桃花凍不緋五色石裂女媧譴祝融上訴開九扉
帝命養之青鎖闥賜以沆瀣憐其饑朝朝暮暮朝太微
翹翎披拂天香馥北斗粲爛星依稀翠輦抱日露未晞

圓肱脩趾逸且頽蹌蹌蹈舞霍以揮散仙引領空相希
嗟哉清峻天下稀勿歎遼東城郭非桂華窅窅甘露澹
味美遠勝商山薇擷英為羞堪咀噉比之琅玕亦庶幾
盤空硬語去脂韋歌以贈君君莫譏

宋濂

越歌

勸郎莫食鑑湖魚勸郎莫棄別時衣湖中鯉魚好寄信
別時衣有萬條絲

戀郎思郎非一朝好似并州花剪刀一股在南一股北
幾時裁得合歡袍

越王臺下是儂家一尺龍梭學織紗願郎莫裁梨子樹
遮却房前夜合花

蘭花篇

陽和煦九畹晴芬溢青蘭潛姿發玄麝幽蘊凝紫檀綠
蘿托芳鄰白谷挹高寒玄聖未成調湘纍久長歎萊施
雖外蔽貞潔終能完豈知生平心卒獲君子觀雜以青

瑤芝承以白玉槃
靈風曉方薦清露
夜初溥此時不見
知駢羅混荒菅
春風桃李華爛若
霞綺攢徒媚夸毗
子千金買歌歡棄
之不彼即要使中
心安願結媿人佩
把玩日忘餐

陶安

秋風辭送梁生

涼飈蕩平野遠送賓
鴻翔蕭蕭西北來
草木忽變黃不
惜草木衰寒入客
子裳曉窗凋鬢影
夜堂搖燭光值此

素節晏令人懷故鄉
援琴賦將歸苦雨菊有芳
盼望埽積陰下土見太陽
明當吹羽翰高飛戾穹蒼

王禕

江上曲

木蘭船繫門前樹
阿郎今朝棹船去
去時為問幾時歸
約道歸時日須暮
江上風水不可期
日暮不知歸不歸

憶別曲

低低門前兩桑樹
憶君別時桑下去
桑樹生葉青復青

金
卷四
知君顏色還如故桑葉成蠶蠶作絲絡絲織作綾滿機
欲將裁作君身衣恐君得衣不思歸

汪廣洋

東吳櫂歌三首

太湖茫茫水拍天吳儂只慣夜行船竹枝歌罷燈將滅
風雨瀟瀟人未眠

艇子搶風過太湖水雲行盡是東吳阿誰坐理青絲網
遮得松江巨口鱸

玻璃冷浸洞庭山雪竹攢青橘柚斑白髮吳娃笑相語
官船不似釣船閑

蘭谿棹歌三首

涼月如眉挂柳灣越中山色鏡中看蘭溪三日桃花雨
夜半鯉魚來上灘

野鳬晴踏浪梯平越上人家住近城箬葉裹魚來換米
松舟一箇似梭輕

棹郎歌到竹枝詞一寸心腸一寸絲莫倚官船聽此曲

白沙洲畔月明時

淳安棹歌

淳安縣前江水平
越女唱歌蘭葉青
山禽只管喚春雨
不道愁人不願聽

哀蛩吟

西風院落無人語
白露泠泠滴秋宇
仰見月明河漢高
唧唧哀蛩弄機杼
唧唧唧唧機杼鳴
綺窗飛度玉梭輕
同聲合奏思無限
萬緒千端織不成
芳蘭夕氣浮金井

寶鴨沈煙翠衿冷蕩子從軍去不歸妾身抱恨愁孤影
此時此夜聞此聲更長夢短難為情銀釭暗擊玉釵碎
錦瑟斜移金鴈橫金鴈斜橫飛不起漫索餘音滿人耳
梨雲化作陽臺夢家書望絕湘江鯉湘江水流東復深
蕩子不歸勞妾心故將鮫人萬斛淚寫入哀蛩腸斷吟

孫炎

迎日詞

鳳炙兮麟脯瑶席兮桂俎樂萬舞兮如雲吹笙竽兮龍

二女干子子載以輿六蒼虹厯天衢雲霈霈兮夜未艾
執長轡兮久相待

宛轉詞

流黃機響春閨織成幼時華綵衣玉為容水為瞳二十
嫁與梁家鴻妾鼓瑟郎鼓琴海枯石爛同一心雲母屏
夜向冥郎是明月妾是星鞭珊瑚障流蘇郎騎高馬妾
坐車女蘿枝延兔絲綿纏到老郎自知徑寸珠水中居
團圓到老妾不如

張以寧

倦繡篇為雲中呂遵義作

薜蘿葉暗江雲暖翡翠單飛怨春晚陳女多情玉鏡分
陸郎薄倖斑駁遠寶鴨團爐百和香錦鴛方褥五文章
陰陰垂柳籠書幌點點飛花落繡牀雙鸞欲寄金龜倩
燕月吳雲不相見柔腸萬轉逐迴文亂緒千條縈弱線
女貞枝上燕雙棲夜合花前思欲迷停針嘿嘿無人會
但覺春山兩葉低曉嘶繡勒門前路夜炙銀燈帳中語

指點香背舊唾痕見妾朝朝斷腸處

朱善

遠別辭送餘干令李謙山

風淅淅兮雲悠悠木葉落兮天宇秋君胡為兮不返嗟
久客兮淹留攬西山兮秀色泛東湖兮弄明月樂莫樂
兮新知心奚忍兮輕別山有虎兮湫有龍勞余思兮忡
忡眇餘干兮何許揮五絃兮送孤鴻父老兮扶藜兒童
兮竹馬侯之去兮我心悲侯之來兮我憂寫桂櫂兮蘭

舟慘子祛兮夷猶南州雖好兮不可以久處嗟子去兮
何以慰我之離愁

詹同

清江曲

清江水清峽水黃清江之上多綠楊浣花女兒立沙際
青裾白足如秋霜蜀山雪消十日雨一夜扁舟欲齊樹
兩岸猿聲不肯休送君流過峽川去

秋夜吟

桂樹叢叢月如霧山中故人讀書處白露濕衣不可去

袁凱

楊白花

楊白花飛入深宮裏宛轉房櫳間誰能復禁爾胡為高
飛渡江水江水在天涯楊花去不歸安得楊花作楊樹
種向深宮飛不去

竹枝歌十一首

并序

錄四首

馬益之邀陳子山應奉秦景容縣尹江上看花二

公作竹枝歌予亦作數首

吳淞江上好春風
水上花枝處處同
得似鴛鴦與鸕鶿
時時來往錦雲中

江水東流更不回
行人白髮苦相催
只恐明朝風雨惡
夜深燈燭亦須來

吳姬玉手好琵琶
少小聲名到處誇
但使主人能愛客
年年來此看江花

松江水碧碧如天
水上行人坐畫船
記得吳兒竹枝調

為君高唱百花前

高啟

折楊柳歌詞二首

高枝拂翠幃低枝垂綺筵
春風千萬樹此樹妾門前
江頭橫吹悲北客休南去
聞道武昌門愁人無別樹

將進酒

君不見陳孟公一生愛酒稱豪雄
君不見揚子雲三世執戟徒工文
得失如今兩何有勸君相逢且相壽
試看

六印盡垂腰何似一卮長在手莫惜黃金醉青春幾人
不飲身亦貧酒中有趣世不識但好富貴亡其真便須
吐車茵莫畏丞相嗔桃花滿溪口笑殺醒遊人絲繩玉
缸釀初熟搖蕩春光若波綠前無御史可盡歡倒著錦
袍舞鸚鵡愛妾已去曲池平此時欲飲焉能傾地下應
無酒鑪處何苦寂寞孤平生一杯一曲我歌君續明月
自來不須秉燭五岳既遠三山亦空欲求神仙在杯酒
中

羅敷行

陌上三月時柔桑多綠枝攜筐行采葉日暮畏蠶飢君
來駐車馬相逢在桑下謾說同心言不是知音者君貴
多輝光妾賤無紅妝自信田間婦難從天上郎長安畫
樓宇無限如花女使君當早歸莫共羅敷語

古詞

妾刀不斷機郎行當早歸還將機中錦作郎身上衣

烏夜啼

啼鳥驚多棲未久半起疎桐上高柳燈下佳人顰淺眉
機中少婦停纖手月入空閨夜欲深數聲猶似聽君琴
行路難

君不見盤中鯉暫失風濤登俎几君不見枝上蜩纔出
冀壤凌雲霄推移變化詎可測勿謂明日同今朝出乘
高車入大馬半是當年徒步者悠悠行路莫相欺為雌
為雄未可知

堂上歌行

堂上歌歌南山主人為歡仰客顏翠帷夜卷出兩鬟移
尊更飲花樹間有明月客不醉歌不歇

少年行

下直平明出禁門笑提博局伴王孫寶刀不敢將輸却
明日沙場欲報恩

相逢行

沽酒渭橋邊平陵俠少年相逢各有贈寶劍與金鞍

君馬黃

君馬黃我馬玄君馬金匱匣我馬錦連乾兩馬喜遇皆
嘶鳴何異主人相見情長安大道可並轡莫誇得意爭
先行搖鞭共踏落花去燕姬酒壚在何處

楊白花

楊白花太輕薄不向宮中飛却度江南落美人踏踏連
臂歌山長水闊奈爾何奈爾何春欲晚何不飛去仍飛
返洛陽樹多啼鴉愁殺人楊白花

擢歌行

溶漾漢潭清
寒荷趁浪平
船輕知體弱
簪滑見鬟傾
落日懸江思
浮雲結浦情
去從千葉隱
歸愛一花迎
吳歛并子夜
誰似棹歌聲

襄陽樂

門前黃柳鴉
雛宿羅幌低
垂婢擎燭
懸璫結珮畧
妝成日暮相
邀漢江曲
水靜花寒月
小明舟中樓
上鬪歌聲腸
斷年年大堤
路南商行過
北商行

長安道

長樂鐘聲動平津樹色開中郎長戟衛丞相小車來新
成賜將第更築候神臺誰念公車客空懷作賦才

白紵詞

白紵出自吳女工著來色與素體同舞時偏向江渚宮
長袖拂起微有風觴催管促四座中攬裾徘徊慘曲終
玉階夜寒零露濃

江南意

妾本南國妹父母愛如珠貌豈慙明鏡身纔稱短襦學

成采蓮唱曉出橫塘上舟小復身輕隨風兩搖蕩歸時
曲岸傍恰見貴遊郎輟歌欲轉棹花淺不堪藏將嗔却
成哂相問那能隱雖憐郎意深終嫌妾家近回首各盈
盈南湖月又生煙波三十里都是斷腸情

猛虎行

陰風吹林鳥鵲悲猛虎欲出人先知目光燿燿當路坐
將軍一見弧矢墮幾家插棘高作門未到日沒收猪豚
猛虎雖猛猶可喜橫行只在深山裏

湘中絃

涼風嫋嫋月粼粼竹色蘭香秋水濱
一夜猿聲流淚盡
黃陵祠下泊舟人

涼州詞二首

蓬婆城下淨無花慘慘黃雲漠漠沙
卷葉誰將番曲奏
白頭都護亦思家

關外垂楊早換秋行人落日旆悠悠
隴山高處愁西望
只有黃河入海流

當壚曲

光豔動春朝妝成映洛橋錢多自解數箏澀未能調花
如秦苑好酒比蜀都饒深謝諸年少來沽不待要

竹枝歌

江水出峽過夔州長流直到海東頭郎行若有思家日
應教江水復西流

躑躅花紅鵲鵲飛黃牛廟下見郎稀大編攤錢賣鹽去
短釵簪葉負薪歸

楓林樹樹有猿啼若箇聽來不慘悽
今夜郎舟宿何處
巴東不在定巴西

秋江曲送顧使君

秋江月滿秋潮大江上行人待潮過
別離休說渡江難
半日順風船穩坐楚江茫茫葭茨平
使君來時雄雉鳴
子弟從軍隔江去幾家猶住夕陽城
水田雖荒飯常足
芟米夜舂二十斛誰道繁華不及前
戶無征稅官無獄
渡江渡江君莫留江北樂似江南秋

秦箏曲

矯絃細雨發
砑羅臂動玉釧鳴
相和關雲隴
月愁思多
愁思多聽此曲
停蜀琴罷燕筑

城虎詞

候潮門開啼早鴉
有虎忽入居人家
母兒畏竄雞犬伏
排籬突戶誰能遮
寧風動樹初哮吼
驚起東營捉生手
怒拔長戈試一春
目光落地倏魂走
南山藜藿深冥冥
白日橫行誰敢撓
何為離窟來城市
牙爪雖全不能恃

君不見壯士遭急縛失路窮時亦如此

子夜四時歌

白白復朱朱芳條冒繡襦
摘來隨女伴賽鬪不曾輸
紅妝何草草晚出南湖道
不忍便回舟荷花似郎好
堂上織流黃堂前看月光
羞見天孫度低頭入洞房
空幃擁鑪坐夜冷微紅滅
郎意似殘灰無因得重熱

寒夜吟

月下凍痕生綠井
隔簾霜片飛無影
樹枝風息轉凝寒

愁人如鳥棲未安夜短夜長應獨覺
熒熒殘燭鳴鳴角

小長干曲

郎採菱葉尖妾採荷葉圓石城愁日暮各自撥歸船

春江行

春江南北疑無岸綠草綠波連不斷
一女紅妝出浣紗
恰如鏡裏見桃花
袂衣猶冷過寒食
雲度春陰半江黑
浦口風多潮正深
輕舟搖蕩愁人心
鷓鴣暮啼歸路遠
飛絮茫茫楚王苑

牧牛詞

爾牛角彎環我牛尾禿速共拈短笛與長鞭
南隴東岡去相逐日斜草遠牛行遲牛勞牛飢
唯我知牛上唱歌牛下坐夜歸還向牛邊卧
長年牧牛百不憂但恐輸租賣我牛

捕魚詞

後網初沈前網起夫婦生來業淘水忽驚網
重力難牽打得長魚滿船喜不教持賣去南津
且向江頭祭水神

願得年年神作主無事全家卧煙雨不論城中魚貴賤
換得酒歸儂不怨

養蠶詞

東家西家罷來往晴日深窗風雨響二眠蠶起食葉多
陌頭桑樹空枝柯新婦守箔女執筐頭髮不梳一月忙
三姑祭後今年好滿簇如雲繭成早簷前繰車急作絲
又是夏稅相催時

射鴨詞

射鴨去清江曙射鴨返回塘晚秋菱葉爛煙雨晴鴨羣
未下媒先鳴草翳低遮竹弓穀水冷田空鴨多瘦行舟
莫來使鴨驚得食忘猜正相關背啞啞毛襪襪潛機一
發那得知

打麥詞

雉雛高飛夏風暖行割黃雲隨手斷疎莖短若牛尾垂
去冬無雪不相宜場頭負歸日色白穗落連耒聲拍拍
呼兒打晒當及晴雨來怕有飛蛾生卧驅鳥雀非愛惜

明年好收從爾食

采茶詞

雷過溪山碧雲暖幽叢半吐槍旗短銀釵女兒相應歌
筐中摘得誰最多歸來清香猶在手高品先將呈太守
竹爐新焙未得嘗籠盛販與湖南商山家不解種禾黍
衣食年年在春雨

賣花詞

綠盆小樹枝枝好花比人家別開早陌頭擔得春風行

美人出簾聞叫聲移去莫愁花不活賣與還傳種花訣
餘香滿路日暮歸猶有蜂蝶相隨飛買花朱門幾迴改
不如擔上花長在

惜花歎

惜花不是愛花嬌賴得花開伴寂寥樹樹長懸鈴索護
叢叢頻引鹿盧澆幾回欲折花枝嗅心恐花傷復停手
每來花下每題詩不到花前不持酒准擬看花直盡春
春今未盡已愁人纔留片萼依前砌全落千英過別鄰

懊惱園中妬花女畫簷不禁狂風雨流水殘香一夜空
黃鸝魂斷無言語縱有星星在薜衣拾來已覺損光輝
只應獨背東窗卧夢裏相隨高下飛

田家行

草茫茫水汨汨上田蕪下田沒中田有禾穗不長狼籍
只供鳬鴈糧雨中摘歸半生溼新婦春炊兒夜泣

憶遠曲

揚子津頭風色起郎帆一開三百里江橋水柵多酒壚

女兒解歌山鷓鴣武昌西上巴陵道聞郎處處經過好
櫻桃熟時郎不歸客中誰為縫春衣陌頭空問琵琶卜
欲歸不歸在郎足郎心重利輕風波在家日少行路多
妾今能使烏頭白不能使郎休作客

金井怨

照水羞見影汲水嫌手冷閒立梧桐陰烏啼秋夜永

新絃曲

舊絃解新絃張冰絲牽愁六尺長寬急頻從指邊聽金

鴈參差移不定新絃響高調勿促不如舊絃彈已熟憐
新厭舊妾恨深為君試奏白頭吟他日愁如舊絃棄泣
向羅裙帶頭繫

照田蠶詞

東村西村作除夕高炬千竿照田赤老人笑祝小兒歌
願得宜蠶又宜麥明星影亂棲烏驚火光辟寒春已生
夜深然罷歸白屋共說豐年真可卜

吳趨行

僕本吳鄉士請歌吳趨行吳中實豪都勝麗古所名五
湖洵巨澤八門洞高城飛觀被山起游艦沸川橫土物
既繁雄民風亦和平泰伯德讓在言游文學成長沙啟
伯基異夢表休禎舊閥凡幾家奕代產才英遭時各建
事狗義或騰聲財賦甲南州詞華並西京茲邦洵多美
麤舉難備稱願君聽此曲此曲非誇盈

王敬伯歌

舟初維琴始薦驛亭邊夜相見詞宛轉情綢繆解環珮

彈空侯調易闌情難歇江波寒墮明月綠壺再傾芳音
欲違譬彼林鳥逢晨各飛羅衣沾霜城烏忽起明日相
思孤棹千里

揚基

長洲春

縠波流暖雲花光豔綠蕢津頭洗紅女蝴蝶上羅裙羅
裙秋水明璫搖白槳飛下雙鴛鴦溘溘潮水響

橫塘晚

川氣夕氤氲愁雲凝晚綠蘭舟蕩秋水東向橫塘宿橫
塘花正開紅桃間竹栽誰家織白苧機聲度水來

梧宮夜

桐階白露下溼螢光炯炯銅盤燒蠟黃秋衾夢魂冷粉
淚鉛華滴雲鬢秋蟬整何處玉鑾聲芙蓉笑孤影

楓陵秋

楓樹落青曉野煙結愁陰聲傳燒竹火人語滄波深鳬
飛秋水黑蛩吟涼露白江月參差光芙蓉照芳魄

綺川遊

川水東北流
川花照青樓
龍船載鳳吹
日來川上遊
沙明屬玉止
苔香翡翠留
漁郎蒲葉底
網得雙吳鉤

春愁曲

小樓十日聽雨卧
春雲作團拂簾過
金黃楊柳曉初勻
雪白梨花春半破
東家胡蝶飛無數
西鄰燕子歸兩箇
玉關萬里尺書稀
春風不似春愁大

毬場曲

軟紅十里平如掌馬蹄踏沙輕不響金袍玉帶五陵兒
飛騎擊球珠作賞身輕臂捷馬游龍綵仗低昂一點紅
倏忽飛星入雲表據鞍回袖接春風有時隨地香塵滾
揚花亂撲桃花粉就窩奪得笑歸來月牙輕旋驪珠穩
一生嬌貴厭朝天不信人間有倒懸但得花間風月好
打球場上自年年

廢宅行

弓刀掛牆旗拂瓦行人過門須下馬日暮將軍縱酒歸

白棒橫街人亂打朱門一閉春草積官印斜封泥浣壁
守卒收蝦屋後池鄰翁晒麥堦前石簾幕當年盡綺羅
網絲顛倒腐螢多杏梁風雨丹青溼時有野鳩來做窠
樓臺易成還易廢前年猶是桑麻地

陌上桑

青青陌上桑葉上帶春雨已有催絲人吐吐桑下語

君莫疑贈薛起宗

有弓莫朝射有劍莫夜舞舞劍空驚半夜雞射弓須射

南山虎當年意氣雙白虹三尺寶劍兩石弓平沙軟草
馬蹄疾仰面射落南飛鴻歸來面皺頭雪白魚皮包劍
弓挂壁逢君一笑杯酒空憐我衰顏手無力手無力眼
有眵作歌贈君君莫疑英雄老去衆所薄何獨區區揚
去非

先生年五十
更名曰去非

張羽

吳宮春詞擬王建

館娃宮中百花開西施曉上姑蘇臺霞裙翠袂當空舉

身輕似展凌風羽遙望三江水一杯兩點微茫洞庭樹
轉面凝眸未肯回要見君王射麋處城頭落日欲棲鴉
下堦戲折棠梨花隔岸行人莫偷盼干將莫邪光粲粲
楚宮夏詞擬張籍

渚宮四面芙蓉開碧水晴搖水井臺玉壺蔗漿光滿滿
當晝君王頻賜來雲綃半幅涼釵滑援琴向風彈白雪
冷玉屏開十指寒輸却鸞篋戲相奪吳綾畫扇鎮長新
肯信年年有炎熱不願生入蓬萊峰願妾世世居王宮

秦宮秋詞擬李賀

涼波翠溼南山影
露滴金人光炯炯
君王夜半捲衣回
樓壁斜開蜀雲冷
西宮桂熟離離子
海童不歸海塵起
蟪蛄啼老不勝秋
小玉採香惜香死
胭脂影破澄潭白
菱角尖尖怎堪摘
鮮紅皺綠來滿船
樓前涼月光團團

漢宮冬詞擬溫庭筠

石鯨去浪搖金池
吹盡宮梅如雪枝
避風臺高風不到
寶帳熟眠人未知
象爐紅熾後
猊影攏瑜軟翠鴛鴦並

李娘喚春春為回笑却人間求火井椒房小妓起常先
玉瓶暖手濯溫泉白頭臣朔寒無履待詔金門霜滿天

松陰夢詞

陽坡碧草秋芊綿疎影漏衣團綠煙龍枝無聲山日午
仙骨蛻空神悄然冰魂微回海山小泠泠鶴語青林表
俯視黃塵蓋九州悠悠凡夢何時曉

徐賁

青青水中蒲

青青水中蒲，織作團團扇。不肯贈傍人，自掩春風面。

猛虎行

爾虎從何來，據住三义口。昨日啖東家，豬。今日噬西家。
狗山中百獸不敢鳴，白楊黃竹陰風生。鄰家少年憑意氣，
彎弓挂箭巡山行。夜深月黑候虎出，明朝荒草餘白骨。

柳短短送陳舜道

柳短短，春江滿。蘭渚雪融香，東風釀春暖。山長水更遙。

浩蕩木蘭橈蘭橈向何處送君南昌去離愁落日煙中樹

白蘋花送王汝器

白蘋花綠蘼草南風吹碧波五月湘江道行人勸酒離
緒多擢女擢郎歌擢歌黃鸝啼時風景好大堤日落奈
君何君今去不可留山疊疊水悠悠

神絃曲

靈風颭旗日光黑燈影半明斜照壁湘筠颯颯泣慘悽

翠裾香帶蘭葉齊跳梁絳鼠舞碧雞神鴉飛出寒煙啼
紙錢嘯火高懸樹千輪萬馬登天去

漁父篇贈瞿敬夫

君本煙波一釣徒載得全家入五湖耽詩每笑唐高士
致產能輕越大夫往來不向州城住朝泊西巖夜東渚
筆牀茶竈何用將蓬底惟留釣魚具第四橋頭春水多
朝朝暮暮自經過綠蓑常帶桃花雨白槳頻翻荇葉波
春風秋月年年好銅斗歌中鬢華老閒愁總在醉中消

樂事從教行處少但取魚來不論遲黃梁綠竹手親炊
飽時把釣醒時唱世事於君定不知

劉崧

秋夜長

月出烏啼城上頭閨中美人生遠愁銀河迢迢當北樓
褰帷弄影揚清謳月光如水地上流珠箔微茫懸兩鉤
羅衣半捲涼颼颼起坐數盡寒更籌更籌數盡明不發
明月鏡中生白髮

織女吟贈黃進賢

憶昔束髮初嬌倚雲錦機折花事戲劇笑詫身上衣一
從十五時學向機中織絲短愁苦長梭緩心轉急永夜
蘭燈懸洞房門前梧葉零秋霜霜寒手凍絲緒亂絡緯
悲啼金井牀春花更疊黃金縷花底青鸞蹴煙霧東風
何日天上來擬奉瑤池宴歌舞十日滿匹恒苦遲一夕
停梭生網絲持刀沈吟剪秋水粉淚欲落秋風吹遠懷
素心人邈在千里道何由託交歡持此永相保東鄰小

姬昔同年至今盛飾為母憐幾回月高鳴杼軸正是他
家夜彈曲

秋夜詞

林烏夜啼金井西蟋蟀在戶聲相齊中天無雲白露下
漸見梧桐青葉低幽居此時愁獨曉蘭燈雙照蛾眉小
歌聲恐逐迴風高掩抑冰絃破清悄絃中語語心自傷
低頭却看明月光羅衣一夜惜顏色庭草明日露秋霜
甘心霜下草祇在堦庭好不作白楊花飛飛洛陽道

芳樹篇

芳樹好容華，深深映狹斜。
二月三月時，千枝萬枝花。
夜舞留瓊珮，春遊礙寶車。
折榮遺遠者，含思獨咨嗟。

東方行

東方閃閃啼，早鴉美人愁。
眠隔窗紗，桐華樹下人來往。
銀牀輓轡，夢中響。

江南弄

江浦晴雲作水流，鴛鴦哺雛花滿頭。
沙堤十里寒溘溘。

湘娥踏縹緲春愁
菖蒲葉齊寶刀綠
珮魚雙剪琪花玉
酸風吹雨不見人
一夜啼痕繡叢竹

照鏡曲

蟠螭雙銜錦帶紅
妝臺刻玉秋玲瓏
綵雲忽開紫鸞舞
明月夜墮香奩中
美人妝罷房櫳杳
鸚鵡呼寒帳中曉
拍簇花迎笑靨開
低飛黛綠秋蛾小
滿庭桃李各嬌春
顧影含羞便惱人
愁來獨掩雲屏宿
手持寶釵扣寒玉
吳綿蜀粉暗消磨
淚滿菱花奈別何
不知昨夜愁深淺

但覺朝來華髮多

歎息行贈別胡忠齋

歎息復歎息志士恒苦辛
少日不得意暮年愧其身前
有尊酒清且旨酌酒奉君君莫止
人生最樂在相知莫
狗虛名輕跣弛沛中屠販還封侯
揚雄草玄空白頭浮
雲不盡萬里意白日長懸千古愁
南山之陰多洞府十
年不歸歎脩阻綠蘿芳草澹風煙
君獨胡為在塵土五
雲館前花滿津紫騮蹀躞騎青春
春時禽鳥各自適燕

子低徊還附人江風蕭蕭吹水急江寺鐘殘野鳥集口
中吟詠眼看山細雨蒼茫愁獨立鄧溪瀉瀉秋水泥見
爾令我懽相攜酒酣燕坐石盤嶺明月正在松林西近
聞煙塵起閩廣官軍驅馳日南上郡邑無人豺虎行道
路蕭條竟安往我思舊遊湖水東昔者登臨今不同常
年九月章浦淨吳霜夜落青芙蓉芙蓉花開日欲暮美
人娟娟隔煙霧一段愁心化綵雲至今飛繞河橋樹今
夕果何夕別君還憶君古來賢達常坎坷慎爾出處超

其羣

春宴曲

大鼓作鼉鳴美人花間相對行忽聞橫吹座中起吹出
雙雙鸞鳳聲鳳聲微茫作復止飛入青天綵雲裏當筵
盛酒金屈卮酌酒勸君君莫辭不見堂前桃李樹昨日
花發今空枝東家作官開車馬西鄰從軍能騎射一生
長客邊塞間芳時不在鄉國下何如載酒鳴雲和手折
山花行唱歌少年有酒不痛飲白髮滿頭君奈何

古意

仙女不照鏡愁來看深井井底那得風搖波亂人影

楊柳曲三首

種柳城南河水邊青枝拂地盡含煙柔絲若有千千尺
應繫儂家蕩子船

種柳城南河水傍常年二月好春光晴風暖日無聊賴
只聽鶯聲也斷腸

金縷織成歌舞衣年年江上惜春暉無端心性輕離別

待得花開只解飛

少年曲

乍出建章宮還過酒肆中
聽歌留寶劍數鴈試琱弓
煙草一片綠風花千點紅
馬嘶驕不住直驟渭川東


姑蘇曲

姑蘇城頭烏夜啼姑蘇臺上風淒淒
芙蓉露冷秋香死美人夜泣雙蛾低
銅龍咽寒更漏促手撥繁絃轉紅玉
鴛鴦飛去櫺廊空猶唱吳宮舊時曲

寄曾郁文短歌

澄江水向東流流向東昌江上頭我有故人在江上十
年不見增煩憂白沙水聲寒活活黃巖雲氣凝清秋豈
無沙棠杙吳女謳可載酒同遨遊狂風吹山波浪惡使
我不得回輕舟翩翩雲中雙飛燕銜書寄我頻留戀書
中展轉道深情但恨相思不相見春燕飛來秋復歸報
書不遣壯心違碧蘭紫蕙何由採只恐蕭條霜露稀

御選明詩卷四



總校官庶吉士臣侍朝

校對官檢討臣蕭九成

謄錄舉人臣傅瓌芳